



№ \_\_\_\_\_

**Олий таълим муассасалари  
ректорлари ва филиаллар  
директорларига**

Олий таълим муассасаларида ўтказиладиган “Ахборот ва мураббийлик соати” машғулотлари Намунавий режасига мувофиқ, 2018/2019-ўқув йилининг ўттиз тўртинчи ҳафтасида ўтказиладиган “Ахборот ва мураббийлик соати” машғулотлари материаллари иловага мувофиқ юборилмоқда.

Шу муносабат билан, Сиздан мазкур ҳафта давомида ўтказиладиган “Ахборот ва мураббийлик соати” машғулотларини **“Инсон хотира туйғуси билан барҳаётдир”** мавзусида юқори савияда ўтказилишини таъминлашингиз сўралади.

(Машғулотлар вазирликнинг 2018 йил 13 сентябрдаги 87-02-2527-сонли хати орқали тақдим этилган “Ахборот ва мураббийлик соати сабоқлари” номли услубий қўлланмага мувофиқ равишда ташкиллаштирилиши лозим).

Илова: 10 бет.

**Ҳурмат билан,  
“Маънавият ва маърифат”  
маркази директори**

**О.А.Худайназаров**

**“Инсон хотира туйғуси билан барҳаётдир” “Ахборот ва мураббийлик соати” машғулотларининг 1-босқичи материаллари.\***

**ЎЗБЕКИСТОН РЕСПУБЛИКАСИДАГИ ИҚТИСОДИЙ,  
ИЖТИМОИЙ-СИЁСИЙ ВОҚЕАЛАРГА ДОИР  
МАЪЛУМОТЛАР**

**БОЛА ҲУҚУҚЛАРИ КАФОЛАТЛАРИНИ ЯНАДА КУЧАЙТИРИШГА  
ОИД ҚЎШИМЧА ЧОРА-ТАДБИРЛАР ТЎҒРИСИДА**

Ўзбекистон Республикаси Президентининг қарори

<http://uza.uz/oz/documents/bola-u-u-lari-kafolatlarini-yanada-kuchaytirishga-oid-shimch-23-04-2019>

**ТАШҚИ ИҚТИСОДИЙ ФАОЛИЯТНИ АМАЛГА ОШИРИШДА  
МАЪМУРИЙ ТАРТИБ-ТАОМИЛЛАРНИ ЯНАДА  
ТАКОМИЛЛАШТИРИШ ЧОРА-ТАДБИРЛАРИ ТЎҒРИСИДА**

Ўзбекистон Республикаси Президентининг қарори

<http://uza.uz/oz/documents/tash-i-i-tisodiy-faoliyatni-amalga-oshirishda-mamuriy-tartib-23-04-2019>

**ИККИНЧИ ЖАҲОН УРУШИ ҚАТНАШЧИЛАРИНИ  
РАҒБАТЛАНТИРИШ ТЎҒРИСИДА**

Ўзбекистон Республикаси Президентининг фармони

<http://uza.uz/oz/documents/ikkinchi-zha-on-urushi-atnashchilarini-rahbatlantirish-t-ris-24-04-2019>

**ХОТИРА ВА ҚАДРЛАШ КУНИГА ТАЙЁРГАРЛИК КЎРИШ ВА УНИ  
ЎТКАЗИШ ЧОРА-ТАДБИРЛАРИ ТЎҒРИСИДА**

Ўзбекистон Республикаси Президентининг қарори

<http://uza.uz/oz/documents/khotira-va-adrlash-kuniga-tayyergarlik-k-rish-va-uni-tkazish-24-04-2019>

*\*Эслатма: Мазкур ҳафтада ўтказиладиган “Ахборот ва мураббийлик соати” машғулотларининг 2-босқич Хотира – кечаги ўтмишини, аждодлар ўғитини, миллий меросимизни англаиб турувчи тушунчаэканлиги, аждодларимизнинг муқаддас хотирасини ёд этиб, эзгу ишларини давом эттириши – бизга тинчлик, омонлик керак, деб яшайдиган бағрикенг халқимизга хос азалий қадриятлиги тўғрисида талаба-ёшларга тушунтирилади.*

*Ҳафталикнинг 3-босқичида талаба-ёшларга ўқувчилик фазилати ҳақида тушунча берилади, 4-босқичда – талабаларнинг қайси босқичдалигига қараб ойнинг бошида берилган китобларнинг бири ҳақида фикр-мулоҳаза юритилади. Ўқишга берилган китобларга якуний хулоса қилинади.*

## **ЎЗБЕКИСТОН ПРЕЗИДЕНТИНИНГ ҚОЗОҒИСТОН ПРЕЗИДЕНТИ БИЛАН ТЕЛЕФОН ОРҚАЛИ МУЛОҚОТИ ТЎҒРИСИДА**

Ўзбекистон Республикаси Президенти Шавкат Мирзиёев 23 апрель куни Қозоғистон Республикаси Президенти Қосим-Жомарт Тоқаев билан телефон орқали мулоқот қилди.

Президентимиз Қозоғистон раҳбарини жорий йил 9 июнь куни ўтказилиши режалаштирилган навбатдан ташқари Қозоғистон Республикаси Президенти сайловига номзод этиб илгари сурилгани билан қутлади ва ушбу муҳим сиёсий тадбирнинг ўтказилишида муваффақият тилади.

Давлат раҳбарлари Қозоғистон Президенти Қосим-Жомарт Тоқаевнинг жорий йил 14-15 апрель кунлари Ўзбекистонга илк давлат ташрифи натижаларини юксак баҳоладилар.

Эришилган келишувларни ҳамда саноат, транспорт-коммуникация ва бошқа соҳаларда аниқ лойиҳаларни изчил амалга ошириш, шунингдек, таълим, соғлиқни сақлаш, маданият ва туризм йўналишларида фаол ҳамкорликни давом эттириш муҳимлиги алоҳида қайд этилди.

Ўзбекистонда Қозоғистон йилининг ишбилармонликка оид тадбирлар ва маданий-гуманитар алмашинувларга бой дастури кардош халқларимизнинг янада яқин бўлишига хизмат қилиши таъкидланди.

Қозоғистон Президенти табрик ва самимий тилаклар учун давлатимиз раҳбарига миннатдорлик билдирди.

Мулоқот сўнгида Ўзбекистон ва Қозоғистон Президентлари кўп қиррали ва ўзаро манфаатли ҳамкорликни стратегик шериклик, кўп асрлик дўстлик ва яхши қўшничилик ришталарига таянган ҳолда мамлакатларимиз ва халқларимиз манфаати йўлида янада мустаҳкамлаш борасида интилишлари қатъий эканини таъкидладилар.

## **ЎЗБЕКИСТОН ПРЕЗИДЕНТИ ХИТОЙ РАИСИ БИЛАН УЧРАШДИ**

Ўзбекистон Республикаси Президенти Шавкат Мирзиёевнинг Хитойга ташрифи 25 апрель куни эрталаб Пекин шаҳрида Хитой Халқ Республикаси Раиси Си Цзиньпин билан учрашувдан бошланди.

Бу ҳақда Ўзбекистон Республикаси Президенти Матбуот хизмати маълум қилмоқда.

Хитой раҳбари Шавкат Мирзиёевнинг “Бир макон, бир йўл” иккинчи халқаро форумида иштирок этиш учун ХХРга ташрифи билан қутлади. Си Цзиньпин Хитой Ўзбекистон билан ҳамкорликнинг бугунги ҳолатини юксак кадрлаши ҳамда мамлакатларимиз ўртасидаги ҳар томонлама стратегик шериклик муносабатларини янада мустаҳкамлашга қатъий интилишини таъкидлади.

Давлатимиз раҳбари халқаро форумда иштирок этиш таклифи учун миннатдорлик билдириб, ушбу тадбир ҳам икки томонлама, ҳам минтақавий ҳамкорликни ривожлантиришда муҳим аҳамиятга эга эканини таъкидлади.

Шавкат Мирзиёев Си Цзиньпинни ва мамлакат халқини яқинлашиб келаётган муҳим сана – Хитой Халқ Республикаси ташкил этилганининг 70 йиллиги билан муборакбод этди.

- Ҳурматли Президент, Сиз биринчи форумда ҳам иштирок этганингизни мамнуният билан эслайман. Шу маънода, Сизни “Бир макон, бир йўл” халқаро форуми асосчиларидан бири сифатида қабул қиламиз, - деди Си Цзиньпин. - Ўзбекистоннинг форумга эътибори ва ундаги иштироки мамлакатларимиз ҳамкорлиги ривожидан далолат беради. Икки томонлама кўплаб келишувларга эришилган ва улар изчил амалга оширилмоқда. Ишончим комилки, Ўзбекистон - Хитой муносабатларининг истиқболи порлоқ.

Ўзбекистон ва Хитой – ҳар томонлама стратегик шериклар. Ўзбекистон ХХРнинг ташқи сиёсий курси ва ягона Хитой масалалари бўйича қатъий позициясини, терроризм, экстремизм ва сепаратизмга қарши олиб бораётган курашини қўллаб-қувватлайди. Хитой мамлакатимизда амалга оширилаётган ислохотлар ва Ўзбекистоннинг минтақавий сиёсатини олқишлайди. Давлатлар халқаро ташкилотлар доирасида фаол ҳамкорлик қилмоқда.

Давлат раҳбарларининг мунтазам учрашувлари ва сиёсий иродаси Ўзбекистон-Хитой ҳар томонлама стратегик шериклик муносабатларини сифат жиҳатидан янги босқичга кўтарди. Бугун сиёсат, иқтисодиёт, савдо, саноат, молия, қишлоқ хўжалиги, қурилиш, фан, таълим ва маданият соҳаларида ҳамкорлик жадал ривожланмоқда.

Хитой – Ўзбекистоннинг энг йирик савдо-иқтисодий ва сармоявий шерикларидан бири. Ўзаро товар айирбошлаш изчил ўсмоқда. Ўтган йил якунларига кўра унинг ҳажми 6,4 миллиард доллардан, жорий йилнинг биринчи чорагида эса 50 фоизга ошган.

Мамлакатимиз иқтисодиётига жалб қилинган Хитой инвестициялари ва кредитлари ҳажми 8 миллиард доллардан ошди. 2017 йил май ойида ХХРга амалга оширилган олий даражадаги давлат ташрифи натижасида умумий қиймати 4,5 миллиард доллардан зиёд лойиҳалар амалга оширилмоқда.

Учрашувда товар айирбошлашни янада кенгайтириш ва диверсификация қилиш масалалари муҳокама қилинди, ўзаро савдо ҳажмини яқин йилларда 10 миллиард долларга етказишдан манфаатдорлик билдирилди. Ўзбекистон иқтисодиётига инвестиция, инновация ва технологиялар жалб этиш соҳасидаги ҳамкорликни мустақамлаш истиқболларига, турли соҳаларда ҳамкорлик бўйича янги кўшма лойиҳалар ишлаб чиқиш, минтақанинг транзит ва транспорт-коммуникация салоҳиятини ривожлантиришга алоҳида эътибор қаратилди.

Давлатимиз раҳбари Ўзбекистон “Бир макон, бир йўл” ташаббусини тўлиқ қўллаб-қувватлаши ва унинг кенг кўламда амалга оширилишига амалий ҳисса қўшишга тайёр эканини таъкидлади.

Хитой Раиси Ўзбекистоннинг бу борадаги иштироки ва ташаббуслари Хитой билан Ўзбекистон ва Марказий Осиё ўртасидаги ўзаро манфаатли ҳамкорликни ҳар томонлама кенгайтиришга хизмат қилишига ишонч билдирди.

Учрашув якунида Шавкат Мирзиёев Си Цзиньпинни давлат ташрифи билан Ўзбекистонга келишга таклиф этди.

## **“БИР МАКОН, БИР ЙЎЛ”: ҲАМКОРЛИКДАГИ ТАРАҚҚИЁТ ИСТИҚБОЛЛАРИ**

Ўзбекистон Республикаси Президенти Шавкат Мирзиёев “Бир макон, бир йўл” халқаро форуми очилиш маросимидан сўнг икки томонлама учрашувлар ўтказди.

Форум ишида 40 дан зиёд хорижий давлатлар ва ҳукуматлар, халқаро ва минтақавий ташкилотлар раҳбарлари қатнашмоқда.

Хитой Халқ Республикаси Раиси Си Цзиньпин анжуманни очиб, унда иштирок этаётган барча хорижий делегациялар раҳбарлари, кўп сонли эксперт ва таҳлилий доиралар вакилларига миннатдорлик билдирди.

Хитой Раиси БМТ, ШХТ, Европа Иттифоқи, Евроосиё иқтисодий иттифоқи каби халқаро ва минтақавий тузилмалар ҳамкорлигида амалга оширилаётган “Бир макон, бир йўл” кўшма лойиҳаси иқтисодий ривожланишга кенг йўл очишини, шу жиҳатдан у турли мамлакатларнинг миллий тараққиёт стратегиясига мос келишини таъкидлади. Лойиҳани биргаликда ҳаётга жорий этиш бутун дунёда иқтисодий ўсиш суръатларини оширишда муҳим роль ўйнаши қайд этилди.

2017 йилда илк бор ўтказилган “Бир макон, бир йўл” халқаро форуми икки томонлама ва кўп томонлама ҳамкорлик механизмларини мустаҳкамлаш, ривожланишнинг янги моделини излаш, шакллантириш ва ҳаракатлантиришга йўналтирилган лойиҳа сифатида эътироф этилмоқда.

Хитой илгари сурган мазкур ташаббус икки йўналиш – қуруқлик ва денгиз йўллари ривожлантириш ва ўзаро боғлаш орқали давлатлараро ҳамкорлик механизмларини мустаҳкамлашга қаратилган. Ҳозирги кунда у Осиё, Европа ва Африкадаги 65 мамлакатни қамраб олган. Келгусида унга бошқа давлатлар ҳам қўшилиши натижасида глобал иқтисодий маконга айланади.

“Бир макон, бир йўл” лойиҳасининг асосий мақсадларидан бири глобал эркин савдо тартибини қўллаб-қувватлаш, Осиё, Европа ва Африка мамлакатлари ўртасида интеграцияни кенгайтиришга қаратилган. Ҳисоб-китобларга кўра, бутун лойиҳанинг тахминий иқтисодий кўлами 21 триллион АҚШ долларини ташкил қилади.

Бугунги кунда 100 дан ортиқ давлат лойиҳада қатнашиш истагини билдирган, 40 дан зиёди Хитой билан ҳамкорлик қилиш бўйича битим имзолаган. Натижада 2013 йилдан 2017 йилгача Хитой ва «Бир макон, бир йўл» лойиҳасига қўшилган мамлакатлар ўртасида ташқи савдо айланмаси 4,8 триллион АҚШ долларига етди, йиллик ўсиш 4 фоиз ошди.

Хитой лойиҳа доирасида икки томонлама ва кўп томонлама ҳамкорликни назарда тутувчи «мослашувчан механизмлар»ни қўллаб келмоқда. Хитойнинг транзит-логистика соҳасига оид лойиҳалари Марказий Осиё мамлакатларининг жаҳон бозорига чиқиши, бошқа давлатлар билан саноат кооперациясини мустаҳкамлашига кенг йўл очмоқда.

Ўзбекистон биринчилар қаторида “Бир макон, бир йўл” ташаббусини қўллаб-қувватлади ва унинг аъзо-таъсисчиларидан бирига айланди. Мамлакатимиз учун денгиз портларига чиқиш жуда муҳим. Шу боис, Жанубий Осиё, Яқин Шарқ ва Африка бозорларига чиқиш имконини берувчи

халқаро транспорт йўлақларини ташкил этиш бўйича лойиҳаларда фаол иштирок этмоқда.

Жумладан, 2016 йилда Фарғона водийсини Ўзбекистоннинг бошқа худудлари билан боғловчи “Ангрен-Поп” электрлаштирилган темир йўли барпо этилди. Мазкур линия Хитойгача бўлган масофани 270 километр қисқартириш имконини берди. Бундан ташқари, Хитой-Қирғизистон-Ўзбекистон темир йўлининг қурилиши мамлакатларимиз учун улкан иқтисодий имкониятлар очади. Натижада мамлакатимиздан Хитой ва Ўрта Шарққа тўғридан-тўғри чиқиш имконияти юзага келади, юк ташиш вақти 5-6 суткага қисқаради. Янги автомобиль йўллари, жумладан, “Андижон-Ўш-Иркиштом-Қошғар” қатновини очиш минтақа давлатлари ўртасида ўзаро манфаатли алоқаларни кенгайтириб, уларнинг иқтисодий тараққиётига кўшимча суръат бағишлайди.

2018 йилда Ўзбекистон ташқи савдо юқларини Хитойдан ва Хитойга темир йўл транспорти орқали ташишда 2017 йилга нисбатан 18,2 фоиз ўсиш кузатилди. Импорт юқларини ташишда 25,8 фоиз ўсишга эришилди.

Анжуманнинг очилишида халқаро савдо ва инвестиция алоқаларини мустаҳкамлаш, мамлакатларнинг иқтисодий бошқарув тажрибаларини такомиллаштириш, янги транспорт ва логистика йўлақлари яратилишини рағбатлантириш бўйича амалга ошириладиган лойиҳалар хусусида сўз юритилди. Ушбу лойиҳада иштирок этаётган мамлакатлар сафи кенгайиб бораётгани дунё миқёсида барқарор ривожланишга интилиш кучаяётганини ифода этиши таъкидланди.

Халқаро форумнинг биринчи куни Халқ вакиллари кенгаши уйида тадбир иштирокчилари шарафига ташкил этилган гала-концерт билан яқунланди.

Ўзбекистон Республикаси Президенти Шавкат Мирзиёев шу куни Пекинда Бутунхитой халқ вакиллари кенгаши Доимий кўмитаси раиси Ли Чжаньшу билан учрашди.

Давлатимиз раҳбари “Бир макон, бир йўл” иккинчи халқаро форумининг ўтказилиши ҳамда унинг доирасида ХХР Раиси Си Цзиньпин илгари сурган ташаббусларнинг амалга оширилиши халқаро ва минтақавий ҳамкорликни ривожлантиришга, кенг минтақамизда дўстлик, яхши кўшничилик ва ўзаро англашув муҳитини мустаҳкамлашга хизмат қилишини таъкидлади.

Хитой Халқ Республикаси Раиси билан учрашувда мамлакатларимиз ҳамкорлигининг янги истиқболлари белгилаб олингани, улар икки давлат ўртасидаги ҳар томонлама стратегик шериклик муносабатларини янада мустаҳкамлашга хизмат қилиши қайд этилди.

Ли Чжаньшу Ўзбекистон ва Хитой ўзаро муносабатларда юксак даражага эришганини мамнуният билан қайд этди.

Кейинги йилларда икки мамлакат ўртасидаги савдо-иқтисодий, инвестициявий, молиявий, маданий-гуманитар ва бошқа кўплаб соҳаларда алоқалар янада фаоллашгани алоҳида таъкидланди.

Ўзбекистон ва Хитойнинг қонун чиқарувчи органлари ўртасида ҳамкорлик борасида ижобий тажриба тўпланган. Парламент

делегацияларининг учрашувлари мунтазам ўтказилиб, бу борадаги шериклик изчил ривожланмоқда.

Учрашувда олий даражада эришилган келишувлар ижроси устидан парламент назоратини кучайтириш масалалари кўриб чиқилди. Бундан ташқари, парламентлараро мулоқот мамлакатларимиз ҳамкорлигини амалий мазмун билан бойитиш, янги дастур ва лойиҳаларни илгари суришга хизмат қилиши қайд этилди.

Бутунхитой халқ вакиллари кенгаши Доимий кўмитаси раиси Ўзбекистон билан Хитой ўртасида эришилган келишувларни амалга ошириш ва кенг қўламли шерикликни янада ривожлантиришга амалий ҳисса қўшишга тайёрлигини билдирди.

Ли Чжаньшу Ўзбекистонда янги босқичда амалга оширилаётган ижтимоий-иқтисодий ислохотларни, уларнинг реал натижалари ва самарадорлигини юксак баҳолади. Унинг фикрича, Президент Шавкат Мирзиёевни ўз сиёсати ва ислохотлари миқёси ва мақсадлари нуктаи назаридан тўла асос билан Хитойнинг буюк ислохотчиси Дэн Сяопинь билан таққослаш мумкин.

Учрашув якунида парламентлараро алоқаларни фаоллаштириш ҳамда самарали ислохот ва янгиланишларни амалга ошириш борасидаги тажрибани чуқур ўрганиш мақсадида қўшма тадбирлар ўтказишга келишиб олинди.

Президентимиз ўзи учун ажратилган қароргоҳда Бирлашган Миллатлар Ташкилоти Бош котиби Антониу Гутерриш билан учрашди.

Давлатимиз раҳбари Бош котибни самимий қутлаб, Самарқанд ва Нью-Йорк шаҳарларида ўтган мазмунли суҳбатларни мамнунлик билан эслашини, ушбу мулоқотлар Ўзбекистон билан БМТ институтлари ва ташкилотлари ўртасидаги шерикликни мустаҳкамлашга хизмат қилганини таъкидлади. Шавкат Мирзиёев Самарқанддаги Марказий Осиё бўйича ва Тошкентдаги Афғонистон бўйича халқаро конференцияларни, Самарқанд шаҳрида ўтган Инсон ҳуқуқлари бўйича Осиё форуми ва бошқа тадбирларни шахсан қўллаб-қувватлагани учун Антониу Гутерришга миннатдорлик билдирди.

Президентимиз Бош котибнинг БМТни ислоҳ қилиш, халқаро хавфсизлик ва барқарорликни, изчил тараққиётни таъминлаш йўлидаги ташаббуслари ва саъй-ҳаракатларини тўлиқ қўллаб-қувватлашини қайд этди. Ушбу ислохотлар Ўзбекистонда Ҳаракатлар стратегияси доирасида амалга оширилаётган қатъий ислохотларни фаол давом эттиришга хизмат қилишини таъкидлади.

БМТ Бош котиби Президентимиз билан яна бир бор учрашиб турганидан мамнун эканини таъкидлаб, Ўзбекистон ташаббуслари халқаро ва минтақавий хавфсизликни мустаҳкамлаш, маънавият, таълим, экология, туризм каби соҳаларни ривожлантиришда муҳим ўрин тутаяётганини қайд этди.

Ўзбекистон Марказий Осиёда ишонч ва яхши қўшничилик муносабатларини мустаҳкамлаш, минтақадаги барча мамлакатлар билан ўзаро манфаатли ҳамкорликни кенгайтиришга қатъий интиломда. Энг муаммоли масалаларнинг ечими топилди, барча қўшнилар билан алоқалар сифат жиҳатидан янги босқичга кўтарилди. Кейинги икки йилда минтақа давлатлари билан товар айирбошлаш ҳажми қарийб 2 баробар ортди.

БМТ Бош Ассамблеясининг Марказий Осиё бўйича тарихий аҳамиятга эга резолюцияси ҳамда Маърифат ва диний бағрикенглик бўйича резолюцияси қабул қилингани Ўзбекистоннинг бу борадаги саъй-ҳаракатларининг халқаро эътирофи бўлди. Мамлакатимиз Ёшлар ҳуқуқлари тўғрисидаги халқаро конвенцияни тайёрлаш ва қабул қилиш бўйича муҳим ташаббусни ҳам илгари сурган.

БМТ Бош котибининг кўмаги туфайли БМТ шафелигида Оролбўйи учун кўп шериклик асосидаги Траст фонди фаолият бошлади. Оролбўйида умумий қиймати 3 миллиард доллардан ортиқ лойиҳалар амалга оширилмоқда.

Антониу Гутерриш Шавкат Мирзиёев раҳбарлигида Оролбўйида аҳоли турмуши сифати ва даражасини ошириш, замонавий уй-жой, ижтимоий инфратузилма ва саноат объектларини қуриш, умуман, Орол фожиясининг салбий оқибатларини юмшатиш борасида амалга оширилаётган чоратadbирларни юксак баҳолади. Оролнинг қуриган тубидаги 500 минг гектардан ортиқ майдонда химоя ўрмонзорлари барпо этилмоқда, 1,1 миллион гектар майдонда қум тутиш тизими яратилди.

Учрашувда жорий йил октябрь ойида Нукусда бўлиб ўтадиган Оролбўйида экологик инновация ва технологияларни ривожлантириш бўйича халқаро конференция якунида Ўзбекистон БМТ Бош Ассамблеясига ушбу ҳудудни "Экологик инновация ва технологиялар ҳудуди" сифатида эълон қилишга доир махсус резолюция қабул қилиш ташаббуси билан чиқиши режалаштирилгани таъкидланди.

Бундан ташқари, 2020 йилда Тошкент шаҳрида Озон қатламини емирувчи моддалар бўйича Монреал протоколининг амалга ошириш масалаларига бағишланган халқаро конференция ўтказилиши қайд этилди.

Суҳбат чоғида Афғонистондаги вазиятни тинч йўл билан ҳал этиш минтақамизда барқарорликни таъминлашнинг муҳим омили экани таъкидланди. Ўзбекистон Афғонистонни минтақавий иқтисодий ҳамкорликка фаол жалб этмоқда, ушбу мамлакат учун савдо, инфратузилма ва ижтимоий лойиҳаларни илгари сурмоқда.

Антониу Гутерриш Ўзбекистон билан кенг кўламли ҳамкорликни янада кенгайтириш учун зарур барча кўмакни кўрсатишга тайёр эканини яна бир бор тасдиқлади.

Президент Шавкат Мирзиёев Ўзбекистоннинг Хитойдаги элчихонаси янги биносини кўздан кечирди.

Кейинги йилларда Ўзбекистон ва Хитой муносабатлари барча соҳалар, жумладан, савдо-иқтисодиёт, инвестиция, технологиялар, энергетика, маданий-гуманитар йўналишларда фаол ривожланмоқда.

Дипломатик ваколатхонамизнинг уч қаватли янги биноси фарғоналик усталар иштирокида миллий бунёдкорлик анъаналари ва замонавий меъморчилик ютуқлари асосида бунёд этилган. Иморат Пекин шаҳри марказидаги Чаоянг ишбилармонлик мавзесида, АҚШ, Япония, Малайзия, Сингапур каби давлатлар элчихоналари билан ёнма-ён жойлашган.

Биринчи қаватда музокаралар, ишбилармонлик ва маданият тадбирларини ўтказишга мўлжалланган "Самарқанд", "Бухоро", "Хива",

“Кўқон” заллари жойлашган. Дарвозадан кираверишдаги айвон халқимиз анъаналари ва бой маданиятини акс эттирган.

Давлатимиз раҳбари бу ердаги шароитлар билан танишар экан, мазкур даргоҳ миллий услубда безатилганидан мамнунлигини билдирди ҳамда у Хитой ва хитой халқининг мамлакатимиз билан ҳамкорликка юксак эътибори намунаси эканини таъкидлади.

Ушбу бино халқларимизни янада яқинлаштирадиган, мамлакатларимиз ўртасида турли соҳаларда ўзаро манфаатли ҳамкорликни кенгайтирадиган, маданиятлараро алоқаларни бойитадиган марказ бўлади. Ўзбекистон ва Хитой ҳамкорлигини янада мустаҳкамлашга қаратилган янги ғоя ва ташаббусларни ишлаб чиқишга хизмат қилади.

## **БИРГАЛИКДАГИ САЪЙ-ҲАРАКАТЛАР МАМЛАКАТЛАР ВА ХАЛҚЛАР КЕЛАЖАГИ УЧУН ЯНГИ ИСТИҚБОЛЛАР ОЧАДИ**

“Бир макон, бир йўл” иккинчи халқаро форуми 27 апрель куни “Яньци” халқаро конференциялар марказида делегация раҳбарларининг давра суҳбати тарзида давом этди.

Унда Ўзбекистон Республикаси Президенти Шавкат Мирзиёев нутқ сўзлади.

Халқаро ва минтақавий ўзаро боғлиқлик масалалари Марказий Осиё, жумладан, денгиз портларига бевосита чиқиш имконияти бўлмаган мамлакатимиз учун долзарб бўлиб келган ва ҳозир ҳам шундай. Ўзбекистон мамлакатларимизнинг барқарор тараққиётида муҳим омил бўладиган “Бир макон, бир йўл” ташаббусини илк кунларданок қўллаб-қувватлаган, деди Шавкат Мирзиёев.

Давлатимиз раҳбари форум давра суҳбатининг Кўшма баёноти қабул қилинишини маъқуллаб, бу минтақавий ҳамкорликни ривожлантириш, умумий мақсадларга эришиш, иқтисодий юксалишнинг янги манбаларини кашф этиш, натижада халқларимиз турмуш даражаси ошишига хизмат қилишини таъкидлади.

Президентимиз Марказий Осиёнинг транспорт ва логистика имкониятларини ошириш, “яшил иқтисодиёт” орқали озиқ-овқат хавфсизлигига эришиш, туризмни ривожлантириш, экологик муаммоларни биргаликда бартараф этиш ва бошқа долзарб масалалар бўйича қатор ташаббусларни илгари сурди.

Марказий Осиё минтақасининг транзит салоҳиятини рўёбга чиқариш ҳамда Хитой – Марказий Осиё – Ғарбий Осиё иқтисодий йўлагини шакллантириш долзарб аҳамиятга эга экани таъкидланди. Тошкент – Андижон – Ўш – Ирқиштом – Қошғар автомобиль йўли, Ўзбекистон – Қирғизистон – Хитой ва Мозори Шариф – Кобул – Пешовар темир йўли лойиҳалари бу борада катта истиқболлар очиши қайд этилди. Шунингдек, Сарик денгиз портлари – Марказий Осиё – Европа йўналиши бўйлаб темир йўлда юк ташишга бир хил тариф ўрнатиш ҳам иқтисодий жиҳатдан мақсадга мувофиқ.

Президентимиз “яшил иқтисодиёт”ни ривожлантириш, озиқ-овқат хавфсизлигига эришиш учун қишлоқ хўжалигига замонавий технологиялар ва илғор ечимларни жорий этиш масалаларига эътиборни қаратди.

Орол денгизи куриши оқибатида юзага келган экологик вазиятни бартараф этиш умумий вазифа эканини таъкидлар экан, Шавкат Мирзиёев шерикларни БМТнинг Оролбўйи минтақаси учун Траст фонди ҳамда Оролбўйи худудида экологик инновациялар ва технологиялар зонаси фаолиятида иштирок этишга чақирди.

Туризм соҳасида алмашинувларни ривожлантириш, бунинг учун “Ипак йўли” бренди остида кўшма дастур ва маҳсулотларни илгари суриш бўйича долзарб таклифлар билдирилди.

Давлатимиз раҳбари Афғонистон масаласига ҳам эътибор қаратиб, ушбу мамлакатда тинчлик ўрнатилиши Марказий ва Жанубий Осиёда янги тараққиёт манбалари яратишини таъкидлади. Шавкат Мирзиёев бу борадаги долзарб масалалар жорий йилнинг кузида Тошкентда бўлиб ўтадиган Афғонистон бўйича Минтақавий иқтисодий ҳамкорлик конференциясида (RECCA) муҳокама этилишини маълум қилди.

Тарихий ва маданий меросимиз, олдимизда турган мақсад ва вазифаларнинг ўхшашлиги ҳамда интилишларимиз муштарақлиги келажакка катта ишонч билан қарашга имкон беради. Халқларимиз биргаликдаги саъй-ҳаракатларимизнинг ижобий натижаларини албатта сезиши керак, деди Шавкат Мирзиёев.

Давлатимиз раҳбарининг фикр ва ташаббуслари катта қизиқиш билан кутиб олинди.

Форумда қуруқлик ва денгиз йўллари ривожлантириш, савдо алоқалари ва давлатлараро ҳамкорлик механизмларини кенгайтиришга қаратилган йирик иқтисодий коридорлар очиш масаласи муҳокама этилди. Бунинг учун транспорт-логистика, энергетика ва телекоммуникация инфратузилмаларини интеграциялаш, макроиқтисодий сиёсатни мувофиқлаштириш, савдо ва инвестиция соҳасидаги тўсиқларни бартараф этиш, саноат кооперациясини кучайтириш зарурлиги таъкидланди.

Таъкидланганидек, “Бир макон, бир йўл” лойиҳасида мамлакатларнинг ягона иқтисодий маконни барпо этиш йўлидаги биргаликдаги маслаҳатлашув, барпо этиш ва фойдаланиш формати йўлга қўйилди. Очқиклик, “яшил иқтисодиёт” ва инновациялардан фойдаланган ҳолда узок муддатли тараққиётнинг янги манбаларини излаб топиш, йирик инфратузилмавий лойиҳаларни биргаликда амалга ошириш мазкур ташаббуснинг асосини ташкил этади.

Ташқи бозорларга чиқишни кенгайтириш, интеллектуал мулкни ҳимоя қилиш соҳасида халқаро ҳамкорликни мустаҳкамлаш, товарлар ва хизматлар экспортини ошириш, макроиқтисодий сиёсатнинг мувофиқлаштирилишини яхшилаш глобал иқтисодий жараёнларни тезлаштириши қайд этилди.

Евроосиёдан Африка, Америка ва Океаниягача чўзилган “Бир макон, бир йўл”нинг курилиши дунё иқтисодиёти ўсиши учун янги имкониятлар эшигини очди, халқаро савдо ва сармоявий фаолият учун янги платформа яратиб берди, глобал иқтисодий бошқарувни такомиллаштириш бўйича янги амалий фаолиятни кенгайтириб, турли мамлакатлар аҳолиси фаровонлигини оширишга ҳисса қўшди. “Бир макон, бир йўл” янги имкониятлар ва тараққиёт йўлидаги умумий йўлдир.

Оммавий ахборот воситалари учун брифингда Хитой Халқ Республикаси Раиси Си Цзиньпин форумда иштирок этаётган давлат ва халқаро ташкилотлар раҳбарлари ҳамкорликни янада ривожлантириш, шериклик ўрнатиш ва мавжуд алоқаларни мустаҳкамлаш, БМТнинг 2030 йилгача мўлжалланган барқарор ривожланиш дастурини амалга ошириш каби масалалар юзасидан музокаралар ўтказганини таъкидлади.

Биз “Бир макон, бир йўл” ташаббусини амалиётга изчил татбиқ этиш борасида кўплаб келишувларга эришдик. Делегациялар раҳбарларининг қарашлари давра суҳбати якунида қабул қилинган Қўшма баёнотда ўз аксини топган. Унда “Бир макон, бир йўл” ташаббуси доирасида ўзаро ҳамкорликда амалга ошириладиган қатор лойиҳалар қамраб олинган. Ушбу йирик ташаббус иштирокчи давлатлар тараққиётига хизмат қилаётгани барча томонидан алоҳида таъкидланди. Биз “Бир макон, бир йўл” концепциясини бойитдик ва уни янада ривожлантиришга келишиб олдик. Мазкур лойиҳага қизиқиш билдирадиган давлатларни қўллаб-қувватлаймиз, деди Си Цзиньпин.

Давлат раҳбарлари кўп томонлама ўзаро манфаатли алоқаларни янада мустаҳкамлаш, автомобиль, денгиз ва ҳаво йўли орқали алоқаларни ривожлантиришга келишиб олгани қайд этилди. Юксак сифатли, барқарор, инклюзив ва кенг кўламли инфратузилмани тараққий эттириш, иқтисодий йўлақлар ва зоналар фаолиятини ривожлантиришга алоҳида эътибор қаратилади. Бунда корхоналарнинг тутган ўрни алоҳида аҳамиятга эга. Бу лойиҳаларнинг янада барқарор бўлишини, хорижий инвесторлар учун адолатли муҳитни таъминлайди.

Форум доирасида томонлар 283 та амалий натижага, давлатлараро келишувлар ва ҳамкорлик лойиҳаларига эришди. Форум доирасида ишбилармонлар қиймати 64 миллиард доллардан зиёд бўлган битимлар имзолади. Буларнинг барчаси “Бир макон, бир йўл” лойиҳаси доирасидаги ҳамкорлик ўзаро манфаатли ва кенг кўламли тус олганидан далолат беради.